

Centro di Ciudad

Instalando ultimo rails y streetsscape ya a cuminsa



Momento cu ta poniendo rails



ORANJESTAD - Segun Ir. Raffy Kock, na cabes di InfraTeam, e subproyecto cu ta instalacion di rails pa e streetcar ta 90% cla. E ultimo pida corespondiente na Havenstraat ya ta wordo hiba pa instala durante e siman aki. Na mesun momento, e contratista encarga cu e parti di streetscape cu ta otro subproyecto tumando luga den Playa, a cuminsa cu e trabou di kita klinkernan existente pa prepara e tereno pa su distribucion y aspecto nobo.

FLUHO DI TRAFICO

Mientras tanto ya e fluho di trafico a custumbra cu e ruta alternativo cu ta hiba e trafico for di Wilhelminastraat pa L.G. Smith Boulevard of Weststraat, via Schelpstraat. E ruta aki ta keda efectivo pa e ocho simannan necesario pa caba cu e trabounan den Havenstraat. E trabounan aki ta inclui tambe restrukturacion di espacio pa crea dos baan, un pa auto y otro specialmente pa e streetcar y busnan yega te central di Arubus.

MANTBRACA CORPORATION

Mantbraca Corporation a ubica su sede central riba e tereno di ex-Texas Furniture Store. For di eynan ta coordina y dirigi e trabounan cu ta wordo haci pa loke ta tra-

ta streetscape y cu ta inclui trottoir, baki di mata, fontein, plaza y bankinan den henter Caya G.F. Betico Croes. Ir. Kock a splica cu e proyecto ta bay den fase di cual e prome ta cuminsa dilanti di edificio di La Linda te na e skina di Dufry. E di dos fase ta sigui te skina di Bon Bini Bazaar y e di tres y ultimo, for di e punto ey te na Nikki Habibe.

PEATONNAN

Peatonnan den Caya principal por a ripara cu e klinkernan existente a wordo kita lagando e base di tera. Segun Kock esaki ta e 'dark before dawn' ya cu ta e ultimo parti prome cu un y tur por mira con e proyecto ta bay keda finalmente. Siguijente awo ta e preparacion di e tereno pa destina cada area cu ta bin den e concepto nobo di diseño y consecuentemente e ponnemento di e klinkernan nobo cu tur e otro piezanan cu ta bay

forma e infraestructura social di caya principal. Ta bon pa recorda cu tur e trabounan aki ta keda cla na luna december proximo y e streetcar lo ta den operacion prome cu fin di aña. Gabinete Mike Eman y InfraTeam tin comprension pa e inconveniencia cu e trabou-

nan y progreso ta trece cune y ta garantisca cu tur esfuerso ta wordo haci pa avansa lo mas lihe posibel y keda cla na e tempo stipula. Na beneficio di e fluho di trafico cu ta dirigi awor riba Schelpstraat, a pone klinkernan entre e rails y aunke esakinan ta bieu y ta poni tem-

poralmente, e ta duna caba un idea con e proyecto ta bay keda una bes cu e ta cla. Por sinti caba con expectativa ta cuminsa crece pa momento cu e streetcar cuminsa core su ruta for di Paardenbaai te na Plaza Comercio y bin bek realisando ocho diferente stop. □